

劉琳 李勇先 王蓉貴 校點

黃庭堅全集

(三)

四川大學出版社

責任編輯：莊 劍
責任校對：魏 銀 李小平
封面設計：羅曉紅
責任印制：吳雨時

圖書在版編目(CIP)數據

黃庭堅全集/(宋)黃庭堅著. —成都:四川大學出版社, 2001. 4

ISBN 7-5614-2105-2

I. 黃... II. 黃... III. ①黃庭堅(1045~1105)
—全集②文學—作品綜合集—中國—北宋
IV. I 214.412

中國版本圖書館 CIP 數據核字(2001)第 22342 號

書名 黃庭堅全集

作 者 劉 琳 李勇先 王蓉貴 校點
出 版 四川大學出版社
地 址 成都一環路南一段 24 號(610065)
印 刷 四川五洲彩印有限責任公司
開 本 850mm × 1168mm 1/32
印 張 99.375
字 數 2190 千字
版 次 2001 年 5 月第 1 版
印 次 2001 年 5 月第 1 次印刷
印 數 0001 ~ 1100 冊
書 號 ISBN 7-5614-2105-2
定 價 (全書四冊)360.00 圓

版權所有◆侵權必究

宋黃文節公全集·外集卷第十四

五言古

宿山家效孟浩然

元豐六年太和作

秋陽沈山西，委照藩落下。霧連雲氣平，濛濛翳中野。空村晚無人，一二小蝸舍。老翁止客宿，喬木縻我馬。松爐依稀煙，槁竹照清夜。幽泉抱除鳴，生涯渺瀟灑。翁家炊黃粱，殺雞延食罷。問余所從誰，庸詎學丘也。投身解世紛，恥問老農稼。予生久遭回，百累未一謝。斑斑吾親髮，弟妹逼婚嫁。無以供甘旨，何緣敢閑暇。安得釋此懸，相從老桑柘。

病懶

治平四年作

病懶不喜出，收身卧書林。縱觀百家語（一），浩渺半古今。空蒙象外意，高大且闕深。間有居

覆盆，豈能逃照臨。一馬統萬物，八還見真心。迺知善琴瑟，先欲絕絃尋。

〔二〕語：原校：「一作治。」

戲贈諸友〔二〕

治平四年作

驚駘無長塗，一月始千里。驂駟嘶清風，祇在一日耳。詩酒廢書史，諸友勿自疑。甯爲驚駘懶，當效驂駟嘶。疏水必有源，析薪必有理。不須明小辨，所貴論大體。生死命有制，富貴天取裁。儻能領真意，何有於我哉。討論銷白日，聖知在黃卷。自此宜數來，作詩情繾綣。

〔一〕自注：「時詔下。」

午寢〔二〕

讀書常厭煩，燕處意坐馳。動靜兩不適，塵勞敗天倪。日昏生黦花，耳聾喧鼓鼙。沈憂愁五神，倦劇委四支。不聊終日堪，況乃久遠期。投書曲肱卧，天游從所之。是身入華胥，彷彿勝初

時。春蠶眠巨箔，夏蜩化枯枝。今之隱几者，豈有異子綦。覺寐須臾間，良亦休我疲。迺知大覺夢，蓋此德之歸。誰爲今日是，二十二年非。

〔一〕題下原注：「戊申作。」聚珍本《山谷詩外集補》翁方綱按：「熙寧元年戊申，先生年二十四，不應云『二十二年非』也。此蓋題下戊申有誤，子耕譜中元末的指在何年也。」

過百里大夫冢

熙寧四年葉縣作〔一〕

行客抱憂端〔二〕，況復思古人。何年一丘土，不見石麒麟。斷碑略可讀，大夫身霸秦。虞公納垂棘，將軍西問津。安知五羊皮，自鬻千金身。末俗工媒孽，浮言妬道真。幸逢孟軻賞，不愧微子魂〔三〕。

〔一〕原注：「冢在南陽縣界，公往鄧州經此。」

〔二〕原校：「一作客行感時節。」

〔三〕原注：「按《呂氏訓蒙》云：或稱魯直『桃李春風一杯酒，江湖夜雨十年燈』以爲極至，魯直自以此猶砌合，須『石吾甚愛之，勿使牛礪角。牛礪角尚可，牛鬪殘我竹』，此乃可言至耳。然如《百里大夫冢》與

《快閣詩》，已自見成就處也。」

漫尉

并序 熙寧三年葉縣作

庭堅讀漫叟文，愛其不從於役，而人性物理，蕭然詣於根理。因戲作《漫尉》一篇，簡舞陽尉裴仲謨，兼寄贈郝希孟、胡深夫二同年。為我相與和而張之，尚使來者知居厚為寡悔之府。然知我罪我，皆在此詩。

豫章黃魯直，既拙又狂癡。往在江湖南，漁樵乃其師。腰斧入白雲，揮車棹清溪。虎豹不亂行，鷗鳥相與嬉。遇人不崖異，順物無瑕疵。不知愛故厭，不悔為人欺。晨朝常漫出，莫夜亦漫歸。漫尉葉公城，漫撫病餘黎。不纂非己事，不趨非吾時。人罵狂癡拙，魯直更喜之。或請陳漫尉，壽尉蒲萄卮。酒行激懦氣，攘袂起哨規（二）。君子守一官，烏肯苟簡為。奈何如秋葭，信狂風離披。漫行恐汙德，漫止將敗機。漫默買猜謗，漫言來詬譏。漫尉謝答客，願客深長思。漫行無軌躅，漫止無羈轡。漫默怨者寡，漫言知者希。吾生漫叟後，不勞與之齊。於戲獨如子，因使目為眉。強顏不計返，乾坤一醯醢。崑崙視糟塹，既化不自知。悔吝雖萬塗，直道甚坦夷。覆轍索孤竹，奔車求仲尼。以旌招虞人，賤者不肯尸。玉潤安可涸，日光安可緇。斯言出繫表，當以罔象窺。賦分有自然，那用時世移。吾漫誠難改，盡醉不敢辭。

〔一〕哨：嘉靖本同。《外集補》作「謂」，當是。

按田

并序 熙寧四年葉縣作

余與晁端國思道，奉檄按馬鞍山東港〔二〕河稻田陂。官丁誤引，道左次水澤。山深徑危，泥潦堅冰，長幹挾馬，僅可以度。行五十里，遂不容馬，步沮洳，虎迹新往來，鳥鳥叢噪荆棘。盡日出入，乃至河上。集近山之農，告以獻利者，皆以為瀕水為舍，居旁治新田，果蕨有畦，桑棗成行。自山之東西，皆不可為陂。港河原出四頭山，支分為三：其一盡南出，少折而東，入舞陽；其一稍西流，又折而北，入石塘河；其一港河也，出山而東流，卒與二水合而入汝河。汝河，今漕河也。吾二人既臨河，具知獻利者之狀，而余獨有感焉。頃歲肉食者以羌胡為憂，師老西鄙，而士大夫知與不知，爭道孫吳覆軍殺將，開虜之輕量中國心，而富貴者今且比肩〔三〕。近者朝言多在民事，欲化西北之麥隴，皆為東南之稻田。良吏攘臂起，郡有召信臣，縣有史起矣。夫土性者，自先王所不能齊，而一切不問，薈夫故苗，灌為新田，茫茫水陂，丘壘平盡。其君子威以法刑，其小人毒以鞭朴。有舉斯有功，有功斯有賞。作者之議曰：前日吏持印相授，以媮眼前，而厚利弃於蒼煙野草之間，是豈不可笑？以余觀之，恐是非特未定也。觀朝廷之意，初不貴必成〔三〕，奉承者要必有功，遂失之耳。語曰：「事傳三人，輒失

其真。」《詩》曰：「周爰咨謀。」蓋使指也。今也咨謀者不慘怛以告者，未忠信歟？夫聽言之道，必以事觀之，奪民之故習而強以所未嘗，其利安在？興利者受實賞，力田者受實弊；郡縣行空文，朝廷收虛名，名為利民，其實害之。議者謂之有意於民乎，吾不知也。以為有功於民乎，今既若是矣。予既有是言，思道屢歎而已。是日所至已遠，不能歸，遂宿水濱民家。北風黃草，破屋見星月。與晁五引酒相酌，忽然已醉，不知跋涉之勞也。綴以詩，強思道和之。

河冰積崢嶸，山雪晴索寞。幽齋怯寒威，沉復出城郭。馬爲蝟毛縮，人歎狐裘薄。淤泥虎跡交，叢社鳥聲樂。橋經野燒斷，崖值天風落。洩雲迷鴻濛，戴石瘦犂畝〔四〕。攀緣若登天，扶服如入壘。窮幽至河壘，落日更檠礪。新民數十家，飄寓初棲託。壯產無惰農，荒榛盡開鑿。臨流遣官丁，悉使呼老弱。恩言諭官意，鄣水陂可作。春秧百頃杭，秋報千倉穫。掉頭笑應僂，吾麥自不惡。麥苗不爲稻，誠恐非民瘼。不知肉食者，何必苦改作。我行疲鞍馬，且用休羈絡。艱難相顧歎，共道折腰錯。勢窮不得已，來自取束縛。月明夜蕭蕭，解衣寬帶索。卧看雲行天，北斗掛屋角。析薪爨酒鼎，興至且相酌。

〔一〕港：原注：「音倦。」

〔二〕且：原作「日」，據《外集補》改。

〔三〕責：《外集補》作「責」。

〔四〕 疊：原注：「音穀。」

贈陳公益 并序

官於葉城之下，士之久遊而寡過者，無若陳公益。言中權衡，行應繩墨，中心誠樂其為人。曾子曰：「目者心之浮也，言者行之指也。」公益眸子睟清，言寡而理贍，其行於是乎可考。予嘗有窮谷蒼煙寂寞之約，唯公益共之，故系之以詩。

陳子善學問，正色鉅其驕。束身居言前，析理在意標。心隨出處樂，性與寂寞超。安安而雅雅，不以行險徼。王良馭驥子，冉弱六轡調。自吾與之遊，忘味如聞韶。志道斯近神，莊生說承蜩。顧恐陳子止，誰能中道要。我求一飯飽，黃綬強折腰。取舍不由己，悲哉馬銜鑣。長嘯天地間，搔首獨無聊。雅約青山雲，伊人與逍遙。有如渝此盟，白日尙昭昭。平時多英豪，楚楚在本朝。吾徒固長物，分當老簞瓢。

將歸葉先寄明復季常 熙寧三年葉縣作

初日照屋山，好鳥哢簷角。卷簾吏卻掃，齋舍寒蕭索。呼兒斲春醪，期與夫子酌。簡書驅我

出，衝雪凍兩腳。莫行星輝輝，曉起雞喔喔。青煙過空村，商旅無遠囊。豈不欲少留，王事苦敦薄。平生白眼人，今日折腰諾。可憐五斗米，奪我一溪樂。公等何逍遙，睥睨寄講學。談犀振清風，棋局落秋雹。雲陰愁濛鴻，山路險攀確。慎無告歸軒，使我數日惡。羸驂逆歸心，旋濤蹶霜潑。悲嘶惜鄣泥，短簞冷難捉。南征喜氣動，迎面蛛絲落。買網鱸金橙，歸償炊黍約〔一〕。

〔一〕原注：「按舊注，公雖作尉，而沿檄不時，如蒲城佚盜，以校見督之類。此詩雖題《將歸葉寄明復季常》，然有『簡書催我去，衝雪凍兩腳』之句，必是因校出而歸無疑。」

擬君子法天運

熙寧四年葉縣作

君子法天運，不言行四時。提提無近功，成歲乃可知。明窺秋毫端，耳察穴蟻爭。羣材極爲力，陰拱收視聽。三辰從昏明，萬物安性命。因時有更張，斟酌如斗柄。細人趨眼前，翻手覆手間。狂風吹長林，何枝鳥能安。須臾誠快意，狼籍不可言。

行行重行行贈別李之儀

元豐三年改官太和作〔二〕

行行重行行，我有千里適。親交愛此別，勸我善眠食。惟君好懷抱，高義動顏色。贈子青琅玕，結以永弗諼。拭目仰盛德，洗心承妙言。予道甚易行，易行乃難忘。虛名織女星，不能成文章。微君好古學，尙誰發予狂。事親見不足，擇友知無方。大聖急先務，君其愛頽光。外將周物情，中不敦己道。以客從主人，辨之苦不早。行身居言前，悟理在意表。苟能領斯會，大自足諸小。勿念一朝患，勿忘終身憂。忠誠照屋漏，萬物將自求。此道不予欺，實吾聞之丘。羣居行小慧，宴笑奉樽俎。益友來在門，疏拙不見取。誰不聞此風，去君鴻鵠舉。

〔一〕原注：「之儀，（諱）〔字〕端叔，寓居蕪湖。」

春思

熙寧四年葉縣作

花柳事權輿，東風剛作惡。啓明動鐘鼓，睡著初不覺。簡書催秣馬，行路如徇鐸。看雲野思亂，遇雨春衫薄。今日非昨日，過眼若飛電。光陰行畹畹，吾事益落莫。閑尋西城道，倚杖俯墟

落。村翁逢寒食，士女飛綵索。平生感節物，始悟身是客。搔首念江南，拏船趁鸕鷀。夷猶揮釣車，清波舉霜鯉。黃塵化人衣，此計誠已錯。百年政如此，豈更待經歷。

戲答公益春思二首

能狂直須狂，會意自不惡。蚤知筋力衰，此事屬先覺。公詩應鍾律，豈異趙人鐸。我爲折腰吏，王役政敦薄。文移亂似麻，期會急如電。賦斂及逋逃，十九被木索。公思當此時，清興何由作。前日東山歸，花如萎莎落。徑欲共公狂，知命知此樂。公家胡蜀葵，雖晚尙隱約。晴明好天氣，慙對亦愜適。妝恨朱粉輕，舞憐衫袖窄。衣襦相補綴，天吳亂鸕鷀。草茅多奇士，蓬蒿有秀色。西施逐人眼，稱心最爲得。食魚誠可口，何苦必魴鯽。清狂力能否，人生天地客。不者尙能來，南窗理塵迹。草玄續周書，揲策定漢曆。有意許見臨，爲公酤一石。

其二

昔人有真意，政在無美惡。微言見端緒，垂手延後覺。大聲久輟響，誰繼夫子鐸。長笑二南間，斯道公不薄。性懷如珮環，詩筆若隕雹。前篇戲調公，深井下短索。子雲最清淨，亦動解嘲作。光塵貴和同，玉石尙磊落。衆人開眼眠，公獨寤此樂。昔在西宮遊，初非朝夕約。邂逅二三

子，蛾眉能勸客。坐嫌席間疏，酒恨盞底窄。驪駒我先返，看朱已成碧。況聞公等醉，歌舞恣所索。舞餘必纏頭，歌罷皆舉白。清狂稍稍出，應節自不錯。譬如觀俳優，誰能不一噓。何爲苦解紛，迺似自立敵。人生忽遠行，車馬無歸迹。黃梁一炊頃，夢盡百年歷。棄置勿重陳，虛心待三益。

衆人觀俳優

衆人觀俳優，誠有可笑時。侏儒笑人後，所笑動未知。非桀是堯舜，諸生同一詞。不能解其會，何笑侏儒爲。桓公方讀書，輪扁釋斧鑿。借問作書人，已歸蒿里宅。至精固不傳，所說乃糟粕。使道如懷珍，分我贍人貧。人將遺朋友，誰不獻君親。喁喁來噍食，泯泯去游魂。昭穆才弟兄，愚智已子孫。愚游智者籠，智受萬物役。奔奔相後先，成則自爲德。勞神不知疲，求所不能知。深心著文字，有如鳥粘鰓。敗新爲故袴，何獨鄭人妻。鵠卵待啄抱，自憐非荆雞。誰能起千載，化此故紙癡。

曉起臨汝

缺月欲崢嶸，鳴雞有期信。征人催夙駕，客夢未渠盡。野荒多斷橋，河凍無裂璽（一）。羸馬踏冰翻，疑狐觸林遁。清風蕩初日，喬木囀幽韻。崧高忽在眼，岌峨臨數郡。玄雲默垂空，意有萬里潤。寒暗不成雨，卷懷就膚寸。觀象思古人，動靜配天運。物來斯一時，無得乃至順。涼暄但循環，用捨誰喜愠。安得忘言者，與講《齊物論》。

〔一〕璽：原注：「音問」。

送陳季常歸洛

人生俱行役，何能如聚鹿。浮楂在江湖，邂逅一相觸。天邊數年別，故人有陳叔。誰云區區葉，車馬肯來尋。清樽聽夜語，常炮三四燭（二）。劇談連古今，天漢瀉崖谷。高材歎加壯，所向動乖俗。我官塵土間，強折腰不曲。飽飯逐人行，君來方拭目。汝穎無奇士，僕夫催結束。嗟如秋窗暉，來少去苦速。蚤吾接雍容，愛德心不足。歲晚託懿親，清義迺愈篤。落日送河梁，鳴蟬度喬

木。歲寒贈君何，唯有南溪竹。

〔一〕地：原注：「地，斜上聲，燈燭燼也。」四庫本注：「音謝，燭貌。」嘉靖本作「燒」。

次韻答薛樂道

薛侯筆如椽，崢嶸來索敵。出門決一戰，莫見旗鼓迹。令嚴初不動，帳下聞吹笛。乍奔水上軍，拔幟入趙壁。長驅劇崩摧，百萬俱辟易。子於風雅間，信矣強有力。天材如升斗，吾恨付與窄。攬物能微吟，假借少儲積。山城坐井底，聞見更苦僻。子非知音耶，何不指瑕謫。

戲贈陳季張

氣清語不凡，郭與陳季優。季子有美質，明月戀高秋。詞談貫百家，炙轂出膏油。放聲寄大塊，肆情無去留。方圓付自爾，規矩爲瘡疣。當其說荒唐，衆口莫能咻。書案鼠篆塵，銜蔬滿床頭。居不省家舍，那問犬馬牛。吾嘗觀聖人，與世爲獻酬。道通衆人行，智欲萬物周。微言觀季子，頗亦有意不。季子捧腹笑，吾豈搢紳囚。我將乘扶搖，南與大鵬遊。相羊九萬里，厭則下滄

洲。黃子失所答，如耕不能耰。井蛙延海鼃，樂事擅一丘。束牲盟伯夷，固自取揶揄（二）。無心以觸物，愛子如虛舟。維楫苟不存，傾覆當誰尤。尙思濟來者，非但自爲謀。

〔二〕揄：原注：「音由。」

寄別陳氏妹

西風吹天雲，頃刻異秦越。叔子從天東，忽與同姓別。錢行在半塗，一食三四噎。遙遙馬嘶斷，芳草迷車轍。引襟滿眼淚，回首寸心折。母氏孝且慈，愛養數毛髮。諸兒恩至均，如指孰可訕。汝今始歸人，綿綿比瓜瓞。中畦不灌溉，芳意還銷歇。黃鳥止桑楚，南山采薇蕨。擇歸既甚明，寡取迺爲悅。我開賢女傳（一），須已爲汝說。在宋有伯姬，潔身若冰雪。下堂失傳母，上堂就焚爇。吾嘗嘉惠康，有婦皆明哲。戮力事耦耕，甘貧至同穴。彼於視三公，其猶吹一呷。雍容二南間，此婦真豪傑。男兒何有哉，今壯而善耄。逢時秉鈞軸，邂逅把旄鉞。富貴多禍憂，朋黨相媒孽。等之穀中遊，巧者未如拙。勿以貧賤故，事人不盡節。母儀尊聖善，婦道尙曲折。葛生晚萋萋，絺綌代裘褐。女工既有餘，枕簟清煩渴。誰言淮蔡遠，曾不以日月。跂予升高丘，佇望飛鳥滅。善懷詩所歌，行矣勿惜別。皇皇太史筆，期汝書英烈。

〔一〕開：四庫本作「聞」。

寄懷趙正夫奉議

元豐八年德平作

春皇撫宇宙，仁氣被園林。草木懷元寵，松柏抱常心。攬觀萬物表，有覺詠時禽。一勸君沽酒，一起予投簪。小人畏罪罟，澡雪奉官箴。雞鳴風雨晦，鶴鳴澗谷陰。維此方寸寶，日月所照臨。澤蒲漸緣弱，山桃破紅深。永懷寂寞人，黃卷事幽尋。虛窗馳野馬，宴坐醉古今。鴛鴦求好匹，笙磬和同音。何時聞笑語，清夜對橫琴〔一〕。

〔一〕原注：「按舊注載公有《題絳本法帖》云：『元豐八年夏五月戊申，趙正夫出此書於平原官舍。』又《題樂府木蘭詩後》云『元豐乙丑五月戊申會食於趙正夫平原監郡西齋』，二詩蓋當時作。又舊按：《國史》元祐三年十月己丑，蘇軾言：『御史趙挺之在元豐末通判德州，而著作黃庭堅方監本州德平鎮，挺之希台提舉官楊景榮之意，欲於本鎮行市易法，而庭堅以爲鎮小民貧不堪誅求，若行市易，必致星散。公文往來，士人傳笑。』云云，公他日宣州之禍亦基於此，故因備載。」